

Ingerlatsivinni qitiusumik qullersaqarfiusuni, aktieselskabiusuni
anpartsselskabiusunilu il.il., siulersuisunut ilaasortanik sulisut qinersisarnerat pillugu
Kalaallit Nunaannut nalunaarut
(Suliffeqarfissuarmi immikkoortortalimmi sinniisoqarneq)

Aktieselskabit pillugit inatsimmi, Kalaallit Nunaannut kunngip peqqussutaatigut nr. 620-kkut 23. juni 2008-meersukkut atortuulersinneqartumi, § 178, tak. § 161, imm. 5 aamma anpartsselskabit pillugit inatsimmi, Kalaallit Nunaannut kunngip peqqussutaatigut nr. 619-ikkut, 23. juni 2008-meersukkut atortuulersinneqartumi, § 22, imm. 6, tak. § 79, imm. 2 naapertorlugit aalajangersarneqarpoq:

Kapitali 1

Sulisut agguaqatigiisillugu amerlassusaannik naatsorsuineq

§ 1. Suliffeqarfissuaq immikkoortortalik ukiuni kingullerni pingasuni agguaqatigiisillugit minnerpaamik 35-nik sulisoqarsimasutut isigineqassaaq suliffeqarfissuup selskabiutaani ataatsimi arlalinniluunniit akunnerit ukiumut suliffiusimasut katilligit minnerpaamik 63.000-iusimappata. Akunnerit suliffiusimasut naatsorsorneqarneranni aallaavigineqassaaq ukiumoortumik akissarsiat tunniunneqartartut sulisut agguaqatigiisillugu akunnermusiaannik agguarlugit.

Imm. 2. Suliffeqarfissuaq ingerlatsivik pineqaraangat tamanna ima paasineqassaaq tassaasoq ingerlatsivik nunami maani nalunaarsorneqarsimasooq, ingerlatsivittut qitiusumik qullersaqarfittut imaluunniit ingerlatsivittut immikkoortortaarfittut suliffeqarfissuarmut ilaasoq, tak. aktieselskabit pillugit inatsimmi § 2, imm. 1, Kalaallit Nunaannut kunngip peqqussutaatigut atortuulersinneqartoq, aamma anpartsselskabit pillugit inatsimmi § 3, imm. 1, Kalaallit Nunaannut kunngip peqqussutaatigut atortuulersinneqartoq.

§ 2. Ingerlatsiviup qitiusumik qullersaqarfiusup siulersuisui qullersaqarfialu inummit, § 4, imm. 3 naapertorlugu taaseqqusisinnaasumit, noqqaavigineqarlutik pisussaapput § 1, imm. 1 malillugu naatsorsuissallutik, tamatumalu inernera suliffeqarfissuup sulisuinut nalunaarutigalugu.

§ 3. Sulisoq pineqaraangat tamanna ima paasineqassaaq tassaasoq inuk 15-inik ukioqalereersimasooq, suliffeqarfissuarmi immikkoortortalimmi akissarsiortutut sulisuusoq, taamaassananili pineqartoq:

- 1) suliffeqarfissuup immikkoortortallip ingerlatsiviisa ilaata qullersaqarfiani ilaasortatut Erhvervs- og Selskabsstyrelsimut nalunaarutigineqarsimappat imaluunniit
- 2) nunap ilaani danskit oqartussaaffigisaata avataani aalajangersimasumik suliffeqarpat.

Imm. 2. Imm. 1, nr. 2 naapertorlugu nunap ilaatut danskit oqartussaaffigisaatut isigineqassapputtaaq danskit umiarsuaat aamma nunap toqqaviata ilaa danskit pigisaat.

Imm. 3. Suliffeqarfissuup immikkoortortallip sulisui pineqaraangata tamanna ima paasineqassaaq tassaasut ingerlatsivimmi qitiusumik qullersaqarfiusumi taassumalu ingerlatsiviutaatut immikkoortortaarfiusuni sulisut.

Kapitali 2

Suliffeqarfissuarmi immikkoortortalimmi sinniisoqarnissaq il.il. pillugu taasineq aamma taasisinnaatitaaneq

Suliffeqarfissuarmi immikkoortortalimmi sinniisoqarnissaq il.il. pillugu taasineq

§ 4. Suliffeqarfissuaraq immikkoortortalik, tak. aktieselskabit pillugit inatsimmi § 2, imm. 1, Kalaallit Nunaannut kunngip peqqussutaatigut atortuulersinneqartoq aamma anpartsselskabit pillugit inatsimmi § 3, imm. 1, Kalaallit Nunaannut kunngip peqqussutaatigut atortuulersinneqartoq, ukiut pingasut kingulliit agguaqatigiisillugu minnerpaamik 35-nik sulisoqarsimappat, tak. § 1, imm. 1, ingerlatsivinni immikkoortorta qarfiusuni sulisut piumasaqarsinnaatitaapput taakkua akornanni taasisutigin eqassasoq suliffeqarfissuup sulisuisa sinniisussaannik aamma ingerlatsiviup qitiusumik qullersaqarfiusup siulersuisuisa sinniisissaannik suliffeqarfissuup immikkoortortallip sulisui qinersissanersut (aappeerluni/naaggaarluni taasineq).

Imm. 2. Suliffeqarfissuarmi immikkoortortalimmi, suliffeqarfissuit arlallit iluanni ingerlatsiviusumi qitiusumik qullersaqarfiulluni, imm. 1 naapertorlugu taasititsisoqarnissaannik piumasaqartoqarpat piumasaqaammi suliffeqarfissuaraq immikkoortortalik amerlanernik ingerlatsivilik ilanngunneqartutut isigineqassaaq.

Imm. 3. Imm. 1 naapertorlugu taasinissamik piumasaqaat saqqummiunneqarsinnaavoq ukunangga:

- 1) ingerlatsiviup immikkoortorta qarfiusup suleqatigiinnissamut atatsimiititaani ataatsimi arlalinniluunniit sulisut tamarmiusut akornanni amerlanerussuteqartunit, imaluunniit
- 2) ingerlatsivimmi immikkoortorta qarfiusumi sulisartut kattuffiinit, soorlu klubbinit sulisullu peqatigiiffiinit, ingerlatsiviup immikkoortorta qarfiusup sulisuisa tamarmiusut minnerpaamik 1/10-iinik sinniisuuffiginnittunit, imaluunniit
- 3) ingerlatsiviit immikkoortorta qarfiusut tamarmik sulisuisa 1/10-iinit.

§ 5. § 4, imm.3 naapertorlugu taasisoqarnissaannik piumasaqaat ingerlatsivimmi qitiusumik qullersaqarfiusumi siulersuisunut allakkatigut saqqummiunneqassaaq. Taasisoqarnissamik noqqaassutip tiguneqarnerata kingorna siulersuisut ataatsimiinnerminni siullermi – kingusinnerpaamilli noqqaassutip tiguneqarneraniit sap. ak. arfinillit qaangiunneranni – isumagissavaat suliffeqarfissuarmi immikkoortortalimmi qinersinermut ataatsimiititamik pilersitsisoqassasoq maleruagassat § 11-miittut malillugit.

Imm. 2. Ingerlatsiviup qitiusumik qullersaqarfiusup siulersuisuini ingerlatsivik siniisoqarpat, tak. § 17, imm. 2, aappeerluni/naaggaarluni taasineq siusinnerpaamik pinsinnaavoq ingerlatsiviup qitiusumik qullersaqarfiusup siulersuisuini sinniisut qinigaaffiisa naanissaat qaammatinik arfinilinnik sioqqullugu.

§ 6. Suliffeqarfissuarmi immikkoortortalimmi sinniisut pillugit taasisoqarsimappat taaseqqittoqarnissamik piumasaqatoqarsinnaavoq siusinnerpaamik taasisoqarnerata kingornaniit qaammatit arfinillit qaangiunneranni.

Taasisinnaatitaaneq

§ 7. Aappeerluni/naaggaarluni taasisinnaatitaavoq sulisoq kinaluunniit, tak § 3, imm. 1, suliffeqarfissuup immikkoortortallip ingerlatsiviutaani immikkoortortaasuni taasisoqarnerata nalaani atorfeqartoq. Suliffeqarfissuarmi qinersinermut ataatsimiititaq nalornisoortoqartillugu aalajangiissaaq oqaaseqatigiinni siullerni piumasaqaat eqquutitinneqarsimanersoq.

Kapitali 3

Suliffeqarfissuarmi immikkoortortalimmi sinniisut amerlassusissaat, valgmandskollegiummi aamma qinigaasinnaassuseq

Suliffeqarfissuarmi immikkoortortalimmi sinniisut amerlassusissaat

§ 8. Suliffeqarfissuarni immikkoortortalinni, ingerlatsivittaani immikkoortorta qarfiusuni sulisut §§ 14-16 naapertorlugit aalajangersimatillugit ingerlatsiviup qitiusumik qullersaqarfiusup siulersuisuinut suliffissuaqarfimmi sinniisussanik qinersisoqassasoq, valgmandskollegie, tak. § 9, suliffeqarfissuarmi sinniisunik aalajangersimasunik amerlassusilinnik taakkualu sinniisissaannik qinersissaaq ilaasortat ataatsimeersuartunit qinigaasimasut aammalu malittarisassat naapertorlugit siulersuisunut ilaasortat pisortat oqartussaataitaannit imaluunniit allanit qinerneqarsimasut amerlassusaasa affaannik amerlassusilinnik, ikinnerpaamilli sinniisunik pingasunik. Sinniisut qinerneqartussat amerlassusaasa kisitsisitaat akunnappat qummut akunnaallisaasoqassaaq.

Imm. 2. Ingerlatsiviup qitiusumik qullersaqarfiusup sulisuisa ingerlatsivimmi sinniisunik marlunnik qinersinnaatitaanertik atorsimappasuk, tak. aktieselskabit pillugit inatsimmi § 49, imm. 3, oqaaseqatigiit aappaat, Kalaallit Nunaannut kunngip peqqussutaatigut atortuulersinneqartoq aamma anpartsselskabit pillugit inatsimmi § 22, imm. 2, oqaaseqatigiit aappaat, Kalaallit Nunaannut kunngip peqqussutaatigut atortuulersinneqartoq, suliffeqarfissuarmi sinniisut, imm. 1 naapertorlugu qinerneqarsinnaasut, amerlassusaat marlunnik ikilineqassapput.

Valgmandskollegiummi

§ 9. Suliffeqarfissuarmi sinniisunik ingerlatsiviup qitiusumik qullersaqarfiusup siulersuisuinut qinersinnaatitaaneq valgmandskollegiummimit ingerlanneqassaaq.

Imm. 2. Valgmandskollegiummip ilaasortarissavai suliffeqarfissuarni ingerlatsiviusuni ataasiakkaani tamani ingerlatsivinni sinniisut.

Imm. 3. Suliffeqarfissuarni ingerlatsiviusuni, sinniisuutitaqanngitsuni, suliffeqarfissuup qinersinermut ataatsimiititaata sulissutigissavaa ingerlatsiviup sulisuisa akunnerminni ilaasortanik marlunnik taakkualu sinniisussaannik valgmandskollegiamut qinersisoqarnissaa. Sulisut tamarmik immikkut ilaasortassatut qinigaasannortittumik ataasiarlutik sinniisussatullu qinigaasannortittumik ataasiarlutik taasisinnaapput.

Qinigaasinnaassuseq

§ 10. Qinigaasinnaassuseqarpoq sulisoq kinaluunniit, tak § 3, nammineersinnaassusilik aamma qinersinissaq sioqqullugu qaammatini 12-ini kingullerni suliffeqarfissuup ingerlatsiviisa arlaanni atorfeqarsimasoq. Sulisoq qinigaasinnaassuseqarnersoq nalornisoqartillugu suliffeqarfissuarni qinersinermut ataatsimiititaq aalajangiisassaaq.

Kapitali 4

Suliffeqarfissuarmi qinersinermut ataatsimiititap katitigaanera il.il., taasinermi qinersinermilu periuseq, matumunnga ilanngullugit taasinertaqanngitsumik qinersineq, qinersinerup inernera aamma nalinginnaasumik qinersineq

Suliffeqarfissuarmi qinersinermut ataatsimiititap katitigaanera il.il.

§ 11. Suliffeqarfissuarni qinersinermut ataatsimiititami ilaasortaassapput sulisunut aqutsisunullu sinniisut. Suliffeqarfissuarni qinersinermut ataatsimiititap ilaasortaasa amerlanersaat tassaassapput sulisut sinniisaat, sapinngisamik ingerlatsivimmit qitiusumik qullersaqarfiusumeersut, ilaasorta qataaseq ingerlatsivinni immikkoortorta qarfiusuni sulisunut sinniisaassaaq, ilaasortanilu minnerpaamik ataaseq siulersuisunut imaluunniit qullersaqarfimmut ilaasortaassaaq ingerlatsivik qitiusumik qullersaqarfiusooq sinnerlugu.

Imm. 2. Ingerlatsivimmi qitiusumik qullersaqarfiusumi sulisunut sinniisuutitaq suleqatigiinnissamut ataatsimiititami sulisunit sulisut akornanni toqqarneqassaaq. Ingerlatsivinni immikkoortortaarfiusuni sulisunut sinniisuutitaq toqqarneqartassaaq malittarisassat § 37, imm. 2 aamma 3-miittut malillugit. Ilaasortat sinneri ingerlatsiviup qitiusumik qullersaqarfiusup siulersuisuinit toqqarneqassapput.

Imm. 3. Suleqatigiinnissamut ataatsimiititaqanngippat ingerlatsivimmi qitiusumik qullersaqarfiusumi siulersuisut ingerlatsivimmi qitiusumik qullersaqarfiusumi sulisut sinniisussaannik taakkua akornanni toqqaassapput. Ingerlatsivimmi qitiusumik qullersaqarfiusumi sulisunut sinniisunik qinersisoqarsimappat taakkua sapinngisamik ilaatitaqartassapput.

Imm. 4. Sulisut ingerlatsiviup qitiusumik qullersaqarfiusup siulersuisuinut qinigassanngortittut imaluunniit qinigassanngorteqqittut suliffeqarfissuarmi qinersinermut ataatsimiititamut ilaasortassatut toqqarneqarsinnaanngillat imaluunniit ilaasortaaginnarsinnaanngillat.

Imm. 5. Suliffeqarfissuarmi qinersinermut ataatsimiititami ilaasortaajunnaarnermi ilaasortap pineqartup suliffeqarfissuarmi qinersinermut ataatsimiititaq tamanna pillugu paasitissavaa. Ilaasortamik nutaamik malittarisassat imm. 1-3-miittut malillugit toqqaasoqarnissaa suliffeqarfissuarmi qinersinermut ataatsimiititap tamatuma kingorna isumagissavaa.

§ 12. Suliffeqarfissuarmi qinersinermut ataatsimiititaq siulittaasussaminik nammineq toqqaassaaq.

Imm. 2. Suliffeqarfissuarmi qinersinermut ataatsimiititap aalajangiineri amerlanerussuteqarluni taasinikkut aalajangiinerussapput. Taasisut naligiimmik amerlassuseqarpata siulittaasup taasineri aalajangiisuusaaq.

§ 13. Suliffeqarfissuarmi qinersinermut ataatsimiititaq imaqarnilialortassaaq, tassani pisimasut pingaarutillit saqummersinneqartassapput, matumani ilanngullugit nalunaarusiat, aalajangiinerit, taasinerit inernerisa qinersinerillu inernerisa imaat tamarmik.

Imm. 2. Imaqarniliat suliffeqarfissuup aqutsisuisa, suliffeqarfissuup aningaasaliisuisa, pigineqataassutinik pigisallit sulisullu kiisalu pisortat attuumassutillit takusinnaassavaat.

Imm. 3. Imaqarniliat suliffeqarfissuup qinersinermut ataatsimiititaata ilaasortaanut atsiorneqassapput minnerpaamillu ukiuni 5-ini paarineqassallutik.

Suliffeqarfissuarmi sinniisunik taasineri periaaseq

§ 14. Suliffeqarfissuarmi qinersinermut ataatsimiititaq pisussaaffeqarpoq pilersinneqarnerminiit sap. ak. sisamat qaangiutsinnagit aap/naaggamik qinersisitsissalluni.

Imm. 2. Suliffeqarfissuarmi qinersinermut ataatsimiititaq taasititsissaaq ima, taasisinnaasut tamarmik, tak. § 7, taasineri peqaataanissaaannut naleqquttumik periarfissaqartillugit, matumani ilanngullugu pisariaqassappat allakkatigut taasititsinikkut.

§ 15. Taasineq pissaaq allakkatigut aamma isertuussaasumik.

Imm. 2. Taasineri taamaallaat aappeerluni naaggaarluniluunniit taasisoqarsinnaavoq.

Imm. 3. Ingerlatsivimmut qitiusumik qullersaqarfiusumut sinniisussanik qinersinissamik sulisut aalajangererat akuerineqassaaq taasisinnaatitaasut ikinnerpaamik affaat aappeerlutik taasisimappata.

Imm. 4. Taasinerup inerneru pigineqalerniariassappat suliffeqarfissuarmi qinersinermut ataatsimiititap ingerlatsiviup qitiusumik qullersaqarfiusup siulersuisui tamatuminnga allakkatigut nalunaarfigissavai aamma taasinerup inerneru suliffeqarfissuup sulisuinut nalunaarutigissavaat.

§ 16. Ingerlatsivik immikkoortortaarfiusoq umiarsuarni nunani allani angalasuni sulisoqarpat suliffeqarfissuup qinersinermut ataatsimiititaata umiarsuarmi sulisut taasisinnaatitaasut, tak. § 7,

sapinngisamik piaartumik ilisimatittussaavai qinersisoqarniartooq kiisalu nalunaarutip matuma imaa pillugu.

Imm. 2. Umiarsuarni ataasiakkaani naalakkat nalunaarut imm.1-imi taaneqartooq tiguineqarniartooq pilersitsissapput qinersitsissusannik pingasunik ilaasortalinnik, tassaasunik umiarsuarmi aqumiunut sinniisooq ataaseq, inuttat sinnerinut sinniisooq ataaseq kiisalu naalagaq, qinersinermut komité -mut siulersuisuusussa.

Imm. 3. Qinersitsissussat pilersinneqarnerminniit sap. ak. ataaseq qaangiutsinnagu § 14, imm. 1-imi pineqartumik taasisitsissapput tamatumalu kingorna taasinerup inernera suliffeqarfissuarmi qinersinermut ataatsimiititamat ingerlaannaq nalunaarasuartaatikku ilisimatitsissutigissavaat, oqaatigalugu aappeerlutik taasisimasut aamma naaggaarlutik taasisimasut kiisalu taasinnitsoortut atorsinnaangitsumillu taasisimasut qassiusut.

Imm. 4. Qinersinerup inernera nalunaarasuartaatikku nassiutiutigalugu qinersitsissut suliffeqarfissuarmi qinersinermut ataatsimiititaq nalunaarasuartaatikku nalunaarfigisinnaavaat suliffeqarfissuarmi sinniisussatut taakkualu sinniisissaattut qinigassanngortittussatut kikkut umiarsuarmi sulisu-nit siunnersuutigineqartut.

Suliffeqarfissuarmi immikkoortortalimmi sinniisunik qinersinermi periaaseq

§ 17. Ingerlatsivik suliffeqarfissuit arlallit iluanni ingerlatsiviuppat qitiusumik qullersaqarfiusooq qitiusumik qullersaqarfimmu tassunga suliffeqarfissuarmi sinniisunik qinersisoqassaaq ataatsimoortumik qinersititsinikkut. Qinersineq suliffeqarfissuarmi amerlanernik ingerlatsivittalimmi ingerlanneqassaaq.

Imm. 2. Suliffeqarfissuarmi, ingerlatsivittaani qitiusumik qullersaqarfiusumi ingerlatsivimmi sinniisunik aktieselskabit pillugit inatsimmi § 49 imm. 2, oqaaseqatigiit pingajui, Kalaallit Nunaannut kunngip peqqussutaatigut atortuulersinneqartut, malillugit imaluunniit anpartsselskabit pillugit inatsimmi § 22, imm. 1, oqaaseqatigiit siulliit, Kalaallit Nunaannut kunngip peqqussutaatigut atortuulersinneqartut malillugit qinersisoqarfiusimasumi, suliffeqarfissuarmi sinniisunik siullerpaamik qinersisoqassaaq piffissap ingerlatsivimmi qitiusumik qullersaqarfiusumi sinniisut qinigaaffiata naaneranut atatillugu.

§ 18. Suliffeqarfissuarmi qinersinermut ataatsimiititap isumagissavai:

- 1) valgmandskollegiumiliortoqarnissaa, tak. § 9, suliffeqarfissuarmi sinniisooqartitsinissaq pillugu aalajangernerup akuersissutigineqarneraniit sapinngisamik piaarnerpaamik, kingusinnerpaamilli qinersinissap ulluata nalunaarutigineqarneraniit sap. ak. 6-it qaangiunneranni, tak. § 19 imm. 2.
- 2) Valgmandskollegiamut ilaasortat qinerseqataanissaminnut periarfissaqarluarnissaat, matumani ilanngullugu pisariaqarpat allakkatigut taasinnikkut, aamma
- 3) sapinngisamik piaartumik qinersisoqarnissaa, kingusinnerpaamilli suliffeqarfissuarmi sinniisooqartitsinissaq pillugu aalajangernerup akuersissutigineqarneraniit sap. ak. 6-it qaangiunneranni.

Imm. 2. Suliffeqarfissuarmi sinniisooqarnissamik aalajangerneq atorunnaassaaq aalajangernerup akuersissutigineqarneraniit kingusinnerpaamik qaammatit 6-it qaangiunneranni qinersisoqarsimangippat.

§ 19. Suliffeqarfissuarmi qinersinermut ataatsimiititap ingerlatsiviup qitiusumik qullersaqarfiusup siulersuisui isumaqatigiinniaqatigereerlugit ulloq qinersiffissaq aalajangersassavaa valgmandskollegiamullu ilaasortat ulluliussamik ilisimatinneqarnissaat isumagissallugu.

Imm. 2. Suliffeqarfissuarmi qinersinermut ataatsimiititap ulloq qinersiffissaq suliffeqarfissuarmi sulisunut nalunaarutigissavaa qinersinissamut ulluliunneqartooq minnerpaamik sap. ak. 6-inik annerpaamillu sap. ak. 10-nik sioqqullugu, tak. § 20.

Imm. 3. Ulloq qinersiffissaq pillugu nalunaarutip imarissavai:

- 1) suliffeqarfissuarmi sinniisussat qinerneqartussat amerlassusissaat, tak. § 8 aamma
- 2) sulisunik suliffeqarfissuarmi sinniisutut imaluunniit taakkua sinniisissaattut qineqqusaarniartunik sulisunut siunnersuuteqaqqusineq. Siunnersuuteqaqqusinermini allanneqarsimassaaq qineqqusaartut amerlassusissaat, tak. 8, kiisalu ulloq siunnersuutitinnit tunniussiffiusinnaasoq kingulleq. Ullup taassuma ulloq qinersiffissaq minnerpaamik sap. ak. 4-nik sioqqussimassavaa.

Imm. 4. Suliffeqarfissuarmi qinersinermut ataatsimiititap isumagissavaa sulisut ulloq qinersiffissaq pillugu nalunaarummik paasinninnissaminnut periarfissaqarluarnissaat.

§ 20. Suliffeqarfissuarni, umiarsuarni nunani allani angalasuni sulisulinni, ulloq qinersiffissaq sulisunut nalunaarutigineqassaaq sivikinnerpaamik sap. ak. 9-nik sivisunerpaamillu sap. ak. 20-nik sioqqutsisumik.

§ 21. Suliffeqarfissuarmi qinersinermut ataatsimiititap misissussavaa qineqqusaartittussatut piukkussat qinigassanngortissinnaanersut, tak § 10, aamma qinigassanngorterussanersut.

Imm. 2. Suliffeqarfissuarmi qinersinermut ataatsimiititap qineqqusaartittussatut piukkussat paasitissavai taamaallaat suliffeqarfissuarmi sinniisuusinnaasut imaluunniit taakkununga sinniisaasinnaasut sulisunit qinikkat, taamaalillutik siulersuisunut ilaasortaajutiginnaanatik ataatsimeersuarnermi qinikkat imaluunniit allanit toqqakkat.

Imm. 3. Suliffeqarfissuarmi sinniisutut taakkualu sinniisissaattut qineqqusaartut tamarmik immikkut allatorneqassapput. Allattuiffiit taakku marluk suliffeqarfissuup sulisunut nalunaarutigineqassapput ulloq qinersiffissaq kingusinnerpaamik sap. ak. 2-nik sioqqullugu. Allattuiffiit imarissavaat qineqqusaartut aqqi, najugaat, suliffigisaat, atorfiat aamma ingerlatsivimmi sulisunut sinniisuuffigisaat. Allattuiffiit paasissutissanik allanik imaqqassanngillat. Qineqqusaartoq ataaseq allattuiffimmi ataasiinnarmi allanneqarsimasinnaavoq.

Imm. 4. Ingerlatsivinni umiarsuarni nunani allani angalasuni sulisulinni, tak. § 20, qineqqusaartunut allattuiffiit umiarsuarnut nunani allani angalasunut nassiunneqassapput, tak. imm. 3, pisariaqassappat nalunaarasuartaatikkut, taamaalilluni allattuiffiit umiarsuup sulisunut nalunaarutigineqarsinnaalersillugit ulloq qinersiffissaq kingusinnerpaamik sap. ak. marlunnik sioqqullugu.

§ 22. Qinersisoqarsinnaanngilaq suliffeqarfissuarmi sinniisussatut taakkualu sinniisissaattut qinigassanngortinnissamat piffissarititap naanerani qinigassanngortittut qinigaasussaniit ikinneruppata. Suliffeqarfissuarmi qinersinermut ataatsimiititap qinersinissaq kinguartissinnaavaa, pisariaqartumik amerlassusilinnik qinigassanngortittoqarnissaa siunertaralugu, kapitalimi matumani piffissarititaasut taaneqartut eqqortillugit. Qinersinerli naammassereersimassaaq ingerlatsiviup qitiusumik qullersaqarfiusup immikkut ittumik ataatsimeersuarnissaa nallertinnagu.

§ 23. Suliffeqarfissuarmi qinersinermut ataatsimiititaq taasiffissanik sanatitsissaaq, taakkunani alfabeti malillugu allassimassapput suliffeqarfissuarmi immikkoortortalimmi sinniisutut taakkualu sinniisissaattut qineqqusaartut aqqi.

Imm. 2. Pappialami taasiffissami allassimassapput qineqqusaartut aqqi, najugaat, suliffigisaat, atorfiat aamma ingerlatsivimmi sulisunut sinniisuuffigisaat kiisalu § 24, imm. 2 naapertorlugu taasisinnaasut amerlassusissaat. Allattuiffiit paasissutissanik allanik imaqqassanngillat.

Imm. 3. Valgmandskollegiap ilaasortaasa akornanni sulisoqarpat umiarsuarni nunani allani angalasuni sulisunik, suliffeqarfissuarmi qinersinermut ataatsimiititap akuerisinnaavaa allakkap puusnaanut matoqqasumut ikisisoqarluni taasisoqassasoq pappialat taasiffissat imm. 1-imi, tak. imm. 2, taaneqartut atornagit.

§ 24. Qinersineq allakkatigut isertuussaasumillu pissaaq pisariaqarpallu allakkatigut taasinikkut pisinnaavoq.

Imm. 2. Suliffeqarfissuup ingerlatsiviisa valgmandskollegiaanut ilaasortat tamarmik immikkut taasisinnaapput suliffeqarfissuup ingerlatsiviani toqqagaaffigisaminni sulisut 35-iuneri tamaasa katillugit sisamariarlutik. Suliffeqarfissuup ingerlatsiviini ataasiakkaani sulisut amerlassusaat ullup qinersiffissap nalunaarutigineqarnerani naatsorsorneqassapput. Taasisut amerlassusaat suliffeqarfissuup ingerlatsiviata kollegiami ilaasortaasa ataasiakkaat akornanni assigiimmik agguataarneqassapput. Taasisunik sinneruttoqarpat taakku suliffeqarfissuup ingerlatsiviata valgmandskollegiami ilaasortaasa akornanni makitsinikkut agguataarneqassapput.

Imm. 3. Valgmandskollegiami ilaasortat tamarmik immikkut taasiffissanik pissapput, pineqartup imm. 2 naapertorlugu taasisinnaanerata amerlassusiisa amerlaqataannik.

Imm. 4. Valgmandskollegiami ilaasortat tamarmik immikkut taasiffissaatiminni tamani ataasiaannarlutik taasisinnaapput qinigassanngortittumik ataatsimik allattorsimaffinniit marlunniit immikkut taasillutik.

Imm. 5. Allattuiffinni tamani qinigassanngortittunik arlalinnik taasiffissami ataatsimi taasisoqarsimappat, imaluunniit qinigassanngortittoq/ut kina kikkut qinerneqarsimanersut paatsuugassaannngitsumik ersersineqanngippat, imaluunniit atinik allanik allattuisoqarsimappat imaluunniit taasiffissaq iluarsineqarsimappat, taanna atorsinnaanngitsutut isigineqassaaq. Suliffeqarfissuarmi qinersinermut ataatsimiititaq nalornisoortoqartillugu aalajangiissaaq taasiffissaq atorsinnaanngitsuunersoq.

§ 25. Qinigassanngortittut § 8 naapertorlugu amerlassusilerlugit naatsorsorneqarsimasut, allattuiffinni tamani taaneqarnerpaasimasut, suliffeqarfissuarmi sinniisutut taakkualu sinniisissaattut qinigaasimapput.

Imm. 2. Qinigassanngortittut marluk arlallilluunniit amerlaqatigiinnik taaneqarsimappata suliffeqarfissuarmi qinersinermut ataatsimiititaq makitsinikkut aalajangiissaaq

Imm. 3. Sinniisissaq amerlanernik taaneqarluni qinerneqartoq suliffeqarfissuarmi sinniisumut amerlanernik taaneqarluni qinerneqarsimasumut sinniisinnngussaaq. Sinniisissaq amerlanernik taaneqartumiit tulliulluni taaneqarluni qinerneqarsimasooq suliffeqarfissuarmi sinniisumut amerlanernik taaneqartumut tulliulluni qinerneqarsimasumut sinniisinnngussaaq, tulliilu taamatut, qinerneqartussat § 8 naapertorlugu amerlassuseqalernissaat tikillugu.

Taasinertaqanngitsumik qinersineq

§ 26. Suliffeqarfissuarmi sinniisussatut taakkualu sinniisissaattut qinersinermut qineqqusaarnissamat piffissarititap qaangiunnerani qineqqusaartut qinigassallu amerlaqatigiinnarpata qinersisoqassanngilaq, kisianni toqqaneq taasinertaqanngitsumik qinersinertut pissaaq, imaappat:

- 1) qineqqusaartut tamarmik taasinertaqanngitsumik qinersinissamat isumaqataappata, aamma
- 2) qineqqusaartut akornanni isumaqatigiissutigineqarpat sinniisissat ataasiakkaat suliffeqarfissuarmi sinniisusumut kimut sinniisiussanersut.

Imm. 2. Ulloq qinersiffissaq kingusinnerpaamik sap. ak. marlunnik sioqqullugu nalunaaruteqarnermi qineqqusaartut suliffeqarfissuarmi sinniisutut taakkualu sinniisissaattut qinerneqartutut isigineqassapput.

Qinersinerup inernera

§ 27. Qinersinerup inernera qinikkallu aqqi najugaallu suliffeqarfissuup qinersinermut ataatsimiititaata imaqarniliuineranut nalunaarneqassapput, tak. § 13, aamma siulersuisunut

qinigaasunullu ingerlaannaq allakkatigut nalunaarutigineqassaaq, soorluttaa q sulisunut nalunaarutigineqassasoq.

Nalinginnaasumik qinersineq

§ 28. Suliffeqarfissuarmi sinniisussatut taakkualu sinniisissaattut ukiut sisamakkaarlugit nalinginnaasumik qinersisoqartarpoq, piumasaqaatit § 4-miittut suli eqquutitinneqarsimappata. Qinerseqqittoqarsinnaavoq. Suliffeqarfissuaq qitiusumik qullersaqarfiusoq nalinginnaasumik ataatsimeersuartinnagu qinersineq naammassineqarsimassaaq.

Kapitali 5

Aaqqiinerup atorunnaarnera

§ 29. Aaqqiineq atorunnaassaaq qinigaaffiup naanerani, suliffeqarfissuup piumasaqaatit § 4-miittut taamaalinerani eqquutitikkunnaarsimappagit.

Imm. 2 Aktieselskabit pillugit inatsimmi § 2, imm. 1, Kalaallit Nunaannut kunngip peqqussutaatigut atortuulersinneqartoq, aamma anpartsselskabit pillugit inatsimmi § 3, imm. 1, Kalaallit Nunaannut kunngip peqqussutaatigut atortuulersinneqartoq, naapertorlugit suliffeqarfissuaqarunnaarsimappat, aaqqiineq atorunnaassaaq.

§ 30. Aaqqiinerup atorunnaarsinneqarnissaa pillugu taasineq aallartinneqassaaq illuatungeriit § 4, imm. 3-mi eqqaaneqartut tamanna pillugu piumasaqaateqarpata. Suliffeqarfissuarmi qinersinermut ataatsimiititaq taasititsisuussaaq malittarisassat §§ 14-16-miittut eqqortillugit. Aaqqiineq atorunnaassaaq tamanna pillugu akuersissuteqartoqarsinnaanerup kingunitsiannua.

Kapitali 6

Suliffeqarfissuarmi immikkoortortalimmi sinniisut sulilernerat aamma tunuarnerat kiisalu atorfininnermi inatsisitigut illersugaaneq

Sulilerneq

§ 31. Suliffeqarfissuarmi sinniisut qinigaqqammersut siulersuisuni sulilissapput ingerlatsiviup nalinginnaasumik ataatsimeersuarnerata kingunitsiannua. Suliffeqarfissuarmi sinniisut taakkualu sinniisaat suliinnassapput qinikkat nutaat siulersuisunut isernissaasa tungaannut.

Imm. 2. Suliffeqarfissuarmi immikkoortortalimmi sinniisut taakkualu sinniisissaat Erhvervs- og Selvsskabsstyrelsenimut nalunaarutigineqassapput.

Tunuarneq

§ 32. Suliffeqarfissuarmi sinniisooq:

- 1) sulisunit tunuartinneqarpat, tak. imm. 4,
- 2) suliffeqarfissuarmi suliunnaarpat,
- 3) nammineerluni siulersuisuniit tunuarpat, imaluunniit
- 4) toquppat

sinniisaata ingerlaannaq taarsissavaa.

Imm. 2. Suliffeqarfissuarmi sinniisooq pineqartoq sinniiseqanngippat sinniisussamik nutaamik taassumalu sinniisissaanik nutaamik naammaqutissamik qinersisoqassaaq, sinniisup tunuartup qinigaaffiani sinneruttumi sulisussamik, aalajangersakkat §§ 17-26-miittut malillugit.

Imm. 3. Naammaqutissamik qinersisoqassappat ingerlatsivimmi immikkoortortaarfiusumi sulisut 1/10-iisa piumasarinnavaat tamatumunnga taarsiullugu qinigaaffiup sinneranut qinersisoqassasoq suliffeqarfissuarmi sinniisussanik taakkualu sinniisissaannik tamanik. Tamanna pillugu noqqaassut saqqummiunneqassaaq naammaqutissamik qinersinissamut ulluliussaq kingusinnerpaamik sap. ak. sisamanik sioqqullugu.

Imm. 4. Suliffeqarfissuarmi sinniisumik tunuartitsinissaq pillugu taasineq aallartinneqassaaq peqataasut § 4, imm.3-mi taaneqartut tamanna pillugu piumasaqaateqarpata. Suliffeqarfissuarmi qinersinermut ataatsimiititaq taasititsisuussaaq malittarisassat §§ 14-16-imiittut eqquutitillugit. Suliffeqarfissuarmi sinniisumik tunuartitsinissaq pillugu aalajangiisoqassappat piumasaqaataavoq taamaallaat taaseqataasut amerlanersaat tamaaliornissamut taasisimassasut.

Inatsisitigut illersugaaneq

§ 33. Suliffeqarfissuarmi sinniisut taakkualu sinniisaat soraarsitaanissamut atukkamillu allatigut ajorseriarnissaannut suliat tungaasigut pineqartukkut imaluunniit assingusukkut sulisunut sinniisitulli illersugaapput.

Imm. 2. Imm. 1 naapertorlugu illersugaaneq pillugu isumaqatigiinningsutit, matumunnga ilanngullugit malittarisassat suut atorneqassanersut aamma malittarisassat unioqputinneqarneri imaluunniit paasineqarnissaat pillugit apequtit, saqitsaattoqartillugu isumaqatigiissitsiniarnikkut aalajangerneqassapput.

Kapitali 7

Suliffeqarfissuarmi immikkoortortalimmi pissutsinik sulisunut paasissutissiineq

§ 34. Suliffeqarfissuarmi immikkoortortalinni sulisut suliffeqarfissuarmi sinniisunik qinersinissaminnik inatsisit malillugit piginnaatitaaffimminnik atorluaaffigisaanni, ingerlatsiviup qitiusumik qullersaqarfiusup siulersuisuisa pisussaaffigaat suliffeqarfissuup sulisuinut paasissutissiisarfissanik pitsaasunik sunniuteqarluartumillu ingerlasunik pilersitsinissaq, suliffeqarfissuarmi pissutsinik paasissutissiinermi atorneqartussanik. Pissutsinik tamakkuninnga paasissutissiineq naleqquttumik pisassaaq. Paasissutissiinermut assersuutigalugu ilanngunneqarsinnaapput suliffeqarfissuup aningaasaqarneranut, tunisassiorneranut, sulisoqarnikkut inissisimaneranut siuariartorneranullu tunngassutillit.

§ 35. Siulersuisut aalajangiissapput, suliffeqarfissuarmi pissutsit paasissutissiissutissallu qanoq ittuunerat naapertorlugit paasissutissiisarfiit sorliit tulluarnepaajunersut. Paasissutissiisinnaapput assersuutigalugu siulersuisut suliffeqarfissuup ulluinnarni aqutsisui aqputigalugit suliffeqarfissuarnilu ingerlatsivinni, suleqatigiinnissamut ataatsimiititalinni, taakku aqputigalugit. Siulianitut ittoqartillugu siunertarineqanngilaq suliffeqarfissuarmi sinniisut ataasiakkaat ilisimatitsissutinik, sulinerminni ilisimalersimasaminnik, aktieselskabit pillugit inatsimmi § 160, imm. 1, Kalaallit Nunaannut kunngip peqqussutaatigut atortuulersinneqartoq, aamma anpartsselskabit pillugit inatsimmi § 79, imm. 1, Kalaallit Nunaannut kunngip peqqussutaatigut atortuulersinneqartoq, naapertorlugit akisussaassuseqarlutik ingerlatitseqqissinnaanerannik allannuinissaq.

Imm. 2. Atuagassianik paasissutissiissutinik saqqummersitsineq, suliffeqarfiup iluani sulisunut atuagassiat assigisaalluunniit, suleqatigiinnissamut ataatsimiititani ataatsimiinnerit, sullivinni ataatsimiinnerit ataatsimeeqatigiinnerillu, suleqatigiinnissamut ataatsimiititanit aqqissuunneqartut, suliffeqarfissuup sulisuinik paasititsiniaanermut periusaasinnaapput atorneqarluarsinnaasut.

Kapitali 8

Sulisut piginneqataassutininut allattaavimmik imaluunniit piginneqataasut pillugit nalunaarsuummik takunnissinnaatitaanerat

§ 36. Suliffeqarfissuarni immikkoortortalinni aktieselskabit pillugit inatsisip § 49, imm. 3-ani, Kalaallit Nunaannut kunngip peqqussutaatigut atortuulersinneqartumi, imaluunniit anpartsselskabit pillugit inatsisip § 22, imm. 2-ani, Kalaallit Nunaannut kunngip peqqussutaatigut atortuulersinneqartumi pineqartuni, kisiannili suliffeqarfissuup sinniisussaaniq qinersisoqarfiusimangitsuni, ingerlatsiviup immikkoortortaasup sulisuinut sinniisoq ingerlatsiviup qitiusumik qullersaqarfiusup piginneqataassutininut allattaavianik imaluunniit piginneqataasut pillugit nalunaarsuutaaniq misissuisinnaavoq.

§ 37. Ataatsimiititaq, ingerlatsiviup immikkoortortaqrarfiisa ataasiakkaat tamarmik sinniisuutitaannik ilaasortalik, ilaasortami akornani ataatsimik toqqaassaaq § 36 naapertorlugu piginnaatitaaffimmik atuisussamik.

Imm. 2. Ingerlatsiviup immikkoortortaqrarfiusup sulisui ataatsimoorussamik sinniisussaminnik toqqaareersimappata, imaluunniit sullivimmi ataasiinnarmik sinniisoqarpat, taanna ataatsimiititamut isissaaq. Allatut pisoqartillugu ingerlatsiviup sulisuisa sinniisaasa ilartik ataaseq ataatsimiititamut isertussatut toqgarsinnaavaat.

Imm. 3. Imm. 2-mi pineqartut avataatigut allatut pisoqartillugu sulisut sinniisumik ataatsimik akunnerminni toqqaassapput ataatsimiititamut isertussamik.

Kapitali 9

Immikkut aalajangersakkat

§ 38. Suliffeqarfissuarmi immikkoortortalimmi sinniisut ingerlatsiviup qitiusumik qullersaqarfiusup siulersuisuinut ilaasortat sinnerisa assinginik piginnaatitaaffeqarput, pisussaaffeqarput akisussaaffeqarlutillu.

§ 39. Ingerlatsivimmi qitiusumik qullersaqarfiusumi, tassani suliffeqarfissuarmi sinniisoqarnissamik piumasagaatit eqqortinneqarsimanatik, malittarisassat naapertorlugit suliffeqarfissuarmi sulisut sinniisunik marlunnik amerlanernilluunniit qinersisinnaatinnearpata, tak. aktieselskabit pillugit inatsisip § 49, imm. 5, Kalaallit Nunaannut kunngip peqqussutaatigut atortuulersinneqartoq, aamma anpartsselskabit pillugit inatsisip § 22, imm. 4, Kalaallit Nunaannut kunngip peqqussutaatigut atortuulersinneqartoq, qinersineq pillugu nalunaarummi matumani malittarisassat taamatulli atuutissapput.

§ 40. Taasinernut qinersinernullu nalunaarummi matumani pineqartunut aamma sulisunik paasissutissiinernut §§ 34-mi aamma 35-mi pineqartunut aningaasartuutit ingerlatsivimmit qitiusumik qullersaqarfiusumit akilerneqassapput.

Imm. 2. Suliffeqarfissuarmi qinersinermut ataatsimiititaq immikkut ittunik imaluunniit annertuunik aningaasartuuteqassanngilaq, siulersuisut taakkunaannga akuersiteqqaareertinnagit.

§ 41. Qinersinermi aalajangerit aalajangiinerillu Erhvervs- og Selskabsstyrelsimut nalunaarutigineqartussat aktieselskabit pillugit inatsisip §§ 157-ianut aamma 159 b-anut, Kalaallit Nunaannut kunngip peqqussutaatigut atortuulersinneqartumut, aamma anpartsselskabit pillugit inatsisip §§ 73-ianut aamma 78-ianut, Kalaallit Nunaannut kunngip peqqussutaatigut atortuulersinneqartumut, ilaatinneqassapput. Allatut pisoqartillugu isumaqatigiinnissutit

nalunaarummi matumani aalajangersakkanut tunngasut eqqartuussivinnit suliarineqartussaapput, tak. § 33.

§ 42. Erhvervs- og Selskabsstyrelsi allanik pisoqartillugu maleruagassiorsinnaavoq taasinermut qinersinermullu tunngasunik, maleruagassianiit §§ 5, 9 imm. 3, 11 imm. 1-3, 16, 18-23, 28 oqaaseqatigiit pingajuiniit aamma 30-miit allaanerusunik.

Kapitali 10

Pineqaatissiissutit

§ 43. Siulersuisunut imaluunniit suliffeqqarfissuarmi qinersinermut ataatsimiititamut ilaasortaq §§ 2, 5, 11 imm. 3, 13-16, 18 imm. 1,19-20, 23 aamma 27 malillugit pisussaaffimminik unioqqutitsisoq akiliisussanngortinneqassaaq.

Kapitali 11

Atortuulersitsinissamik aalajangersakkat

§ 44. Nalunaarut atortuulerpoq ulloq 1. august 2008.

Erhvervs- og Selskabsstyrelsen, ulloq 28. juli 2008

OLE BLÖNDAL

/Grethe Krogh Jensen